

Aruba Grand Hotel birando un resort hopi elegante

ORANJESTAD (AAN): Hotelnan na Aruba sa di e importancia pa renoba y remodela nan propiedad, pa asina nan keda competitivo den e mercado, y principalmente pa nan drenta e milenio nobo cu un bunita imagen y alavez, contribui na e clase di turista cu ta bin Aruba.

Aruba Palm Beach Hotel ta uno cu awor yama "Aruba Grand Hotel", y nan ta terminando nan proyecto di renobacion cu a costa nan como 10 milyon Dollar, y tur esaki cu financiamiento priva. DIARIO a haya un recorrido den e Hotel aki pa check con cos ta bayendo.

Siman pasa e seccion di mas nobo, esta "Ocean Suites" a keda completamente cla, y cada camber tin un bista masha bunita pa Laman Caribe. Nan tin dos camber, cu baño apart, jacuzzi, douche, comedor, cushina, y su sala. E tin un bunita porch priva tambe, cu un hardin bunita y e tin su propio trapi pa bo baha pasando via e Poolbar. Pues e huesped mester pasa den Lobby djis pa bay su Suite.

Prome y segundo piso ta completamente cla, y e renobacion a encera henter e gang como tambe e cambenan. E huesped por hasta cumpra e camber, si acaso el a guste asina hopi.

E proyecto ta sigui su rumbo, y e entrada di Hotel lo haya su renobacion y keda cla pa verano di 1999, marcando asina e fin di e

proyecto.

Hasta e area di piscina a worde cambia, como cu awor bo por come desayuno, almuerzo, y cena eybando mes. E restaurant pafor a haya mosaico masha elegante, un bunita dak completamente di palo, y rond di dje tin un bunita hardin pa e huesped admira, cu un brug tambe cu ta sirbi como un punto bunita pa saca foto.

E pool mes a haya un cambio drastico. Esun bieu tabata dificil pa personanan di edad drenta aden, como cu e no tin trapi. Awor si nan a pone un trapi comodo, pa hende di tur edad por drenta poco-poco den piscina.

DIARIO a keda sumamente contento di mira con bunita Aruba Grand Hotel a bira. Un resort chikito pero sumamente bunita. Un felicitacion na su gerente general Richard Velasco cu e bunita proyecto.

Gran parti di e placa di renobacion a worde inverti den companianan local, manera pro-Tec, De Cuba Electronics, Dijkhoff Contractors, Franklyn's Real Estate NV, Croon Electric. Hopi importante ta cu e Hotel no a cera su portanan durante renobacion. Tur hende a keda traha, aunke a haya algun reclamo di huespednan, pero na un manera profesional e gerente general a logra convence nan cu e trabao ta pa haci e Hotel bunita, te cu nan a book pa otro aña regresa Aruba!

